

Qalam

KDN 3036.

Muharam 1388

April 1968

Bilangan 210

60 sen.

Tahun Baharu Kita

Keluaran ini, berbetulan dengan hari menyambut awal Muharam tahun 1388 Hijrah iaitu tahun baharu kita umat Islam.

Dengan itu kita mengucapkan selamat “Menyambut Tahun Baharu Hijrah” kepada sekalian para pembaca kita di dalam dan di luar tanah air sambil berdoa ke hadrat Ilahi semoga kita menghadapi tahun ini di dalam keadaan aman dan sejahtera dan negara kita di dalam suasana tenteram dan damai – dan pemimpin-pemimpin kita semoga dilapangkan Tuhan hati mereka lebih giat berusaha di dalam perkembangan-perkembangan agama Islam di negara ini – Amin.

* * *

Akibat Yang Tidak Dikehendaki

Kerajaan Singapura sudah pun memutuskan dan melakukan tindakan tarik pas-pas kerja orang-orang Malaysia dan ini melibatkan kepada beberapa banyak rakyat-rakyat Malaysia yang berada di Singapura sudah ditarik pas-pas kerja mereka yang bakal mengakibat 50,000 pekerja-pekerja Malaysia di Singapura yang bakal diberhentikan. Di dalam mengambil langkah ini kerajaan Singapura

memberi pandangan bahawa langkah yang dibuat oleh mereka itu adalah bertujuan untuk memberi kerja kepada rakyat Singapura yang makin bertambah dari semasa ke semasa.

Di dalam mengambil langkah ini, kerajaan Singapura tidak mengadakan perundingan terlebih dahulu dengan kerajaan Malaysia tentang rakyatnya yang terlibat dan tidak pula memerhatikan bahawa di Malaysia ada banyak rakyat Singapura yang mungkin terlibat daripada langkah-langkah yang dibuat olehnya itu. Apabila keputusan itu terus diambil oleh kerajaan Singapura dan langkah-langkah dilakukan, maka kerajaan Malaysia terpaksa memerhatikan hal ini. Orang Singapura yang bakal terlibat di Malaysia adalah seramai 60,000 orang.

Tengku Abdul Rahman, Perdana Menteri

Malaysia, mensifatkan perbuatan kerajaan Singapura itu kejam.

Kerajaan Malaysia terpaksa mengambil tindakan untuk menyelamatkan rakyatnya yang dibuang kerja itu dan terpaksa pula mengambil langkah yang tidak digemarinya untuk mengadakan satu-satu peraturan, untuk mengadakan pas-pas kerja di Malaysia dan tentunya bakal tidak akan mengeluarkan pas-pas kerja ke atas rakyat Singapura. Akibat yang pertama terkena atas rakyat Singapura ialah seramai 1,250 orang yang diberi pas-pas kerja sementara yang tempohnya akan habis tidak lama lagi.

Di dalam kenyataan pula Tengku menyatakan bahawa tidak ada kemungkinan baginya beliau untuk berjumpa dengan kerajaan Singapura kerana dalam masa menulis ini, seramai 462 orang telah pun didaftarkan sudah dibuang

kerja di Singapura di antaranya 303 orang Melayu.

Memandang kepada peristiwa ini, sekalipun ada kemudahan-kemudahan yang bakal diberi untuk berpindah dan seumpamanya, tetapi akibatnya akan melibatkan tidak kurang daripada setengah million manusia yang bakal bertempiaran dan bakal mulakan penghidupan baharunya yang belum tentu keadaannya. Orang-orang Malaysia yang akan balik ke Malaysia belum tentu dapat menyelenggarakan kehidupan baharunya dan hal ehwal pelajaran anak-anaknya, dan demikian juga orang-orang Singapura kalaupun pulang bakal mendapat kesusahan yang sedemikian itu juga, dan ini mungkin membawa akibat-akibat bukan sahaja perasaan tidak puas hati tetapi juga memungkinkan menimbulkan hal-hal yang tidak diingini.

Persoalan ini adalah menyusahkan orang ramai yang berasal satu yang dahulunya bebas pergi balik di antara kedua-dua buah negeri itu. Perkara ini sepatutnya tidak timbul jika perkara ini difikirkan oleh kerajaan Singapura semasak-masaknya atau berunding lebih dahulu dengan kerajaan Malaysia. Apalah ertinya mengeluarkan 50,000 orang pekerja Malaysia kalau kerajaan Singapura bakal menampung pula rakyatnya seramai 60,000 orang. Susah bukannya pemimpin-pemimpin negara yang membuat perintah, tetapi yang menanggung akibat buruk itu ialah rakyat jelata yang mahu hidup mencari sesuap pagi dan petang – merekalah yang bakal terlonta-lonta seperti bola ditendang ke sana ke mari dengan tidak membawa sesuatu keuntungan atau